


www.BibleForChildren.org


SAN MATEO 8



De nī nchāha ūnī quīvī, de nī īyo iin vico tándāhá ñuū
Caná ndáñúū Galilea. De ñúcuán íyó naná Jesús. De
suni nī ncana nchivī Jesús jíin ndá tēe scuáha jíin yā,
nī jēhēn yā vico jíin ndá dē.



De nī ndoco vino. De naná Jesús nī ncāhān ña jíin yā:
Nī ndoco vino ndá ji, ncachī ña. De naná yā chi nī
ncāhān ña jíin ndá nchivī jícó ndíso cōhō: Sāhá ndá nú
ndācá jā cáchī yā nūū nū, ncachī ña.



De nī ncāhān Jesús jíin nchivī jícó ndíso
cōhō: Chuhun chitú ndá nú ndute tinaja
yáhá. De nī nchuhun chitú ndá jí. De nī
ncāhān yā: Mitan de tavā ndá nú jacū de
quīsiáha nú coto túnī tēe cúu encargado
vico, ncachī yā. De nī jēsiáha jí
nūū dē.




De nī jito túnī dē ndute jā ní nduu vino, de nduú jínī dē
ní cúu nūū ní nīhīn ndá ji. Chi maá-ni ndá mozo cúu jā
jínī, chi maá ji nī ntavā
ndute. Nūcuán de tēe
encargado nī ncana
dē tēe tándāhá.



De nī ncāhān dē: Ndācá nchivī chi xihna cā vino vāha
jéhe ji, de tá nī jihi vāha nchivī íyó vico, de sá de jéhe
ji vino jā íyó núu cā. Sochi
maá nú tucu nī nsāhá nú,
chi jā sándīhí de jéhe nú
vino jā váha ndasí cā,
ncachī dē.





Tiñu yáhá já ní nsāhá Jesús inī ñuū Caná ndáñúū
Galilea cúu tiñu ñáhnú já xíhna ñúhún
já ní nsāhá yā já stéhēn yā
poder yā. De súcuán nī
stéhēn yā já cúñáhnú
ndasí yā. De ndá tēe
scuáha jíín yā nī
ncandíja
dē yā.



De nī jēhēn Jesús vehe Pedro. De
nī jinī yā naná chíso dē jā cáá ña
yíhí quīji ña.



De nī ntiin yā ndahá ña, de nī nquee-ni quīji ña. De nī nacōo ña-ni, de nī nsāhá ña jā ní nchajī yā jíin ndá dē.



De tá nī nquēe ncandī de nī ncuaā, de nī nquenda ndá
nchivī vāsiáha ji ndá jā cúhū jíin jā ñúhún tāchī inī. De
ndihi nchivī ñuū
ñúcuán nī ncutútú ji
viéhé ñúcuán.



De nī nasāhá vāha yā cuāhā nchivī cúhū quéhén
nūū cuēhē, de nī ntavā yā cuāhā tāchī inī ji. De ndá
tāchī chi ja jínī ji yā, sochi nduú ní jéhe yā tūhun jā
cachī tūhun ji ní iin cúu yā.



De ndiviī nchivī cúnī jī jā quehé jī yā, chi
súcuán ndúvāha jī sáhá yā jíin poder yā.



Ñúcuán de nī nquenda cūmī tēe nūū yā,
ndíso ndá dē iin tēe jā ní nduvehlé.




De nduú ní ncúu quīvi ndá dē nūū yā
sīquī jā íyó chitú nchivī. De nī ncaa dē
sīquī vēhé, de nī nacune dē
xīnī vēhé ndāā nūū íñí yā,
de yavī ñúcuán nī scúun dē
tēe cúhū, yósō dē
nūū iin camilla.




De nī jinī Jesús jā cándija ndá dē jā cuu nasāhá vāha
yā tēe cūhū. De nī ncāhān
yā jíin tēe cūhū: Lílū, ja
née cáhnú inī ni nūū ndá
cuāchi nú, ncachī
yā. Cáhān ni jíin nú,
nacōo de naquehen
nú camilla nū de
quīnohōn nū vehe
nú, ncachī yā.



Ñúcuán de nī nquīvi Jesús inī barco, de ndá tēe scuáha
jíin yā nī nquīvi dē cuāhān dē jíin
yā. De nūū mar nī jīquīhi iin
tāchī níhin, de nī scáa ndute
mar, de nī nquīvi inī
barco. De maá Jesús
chi quíxīn yā.




De nī ncāhān yā jíin ndá dē: ¿Nūcu yúhú ndasí ndá nú? De nduú cándíja nīhin nú jā cācu nú sāhá nī, ncachī yā. Nūcuán de nī nacuiñī yā, de nī ncāhān yā nūū tāchī níhin jíin nūū mar. De nī ncuu nañíí-ni. De nī nsāhvi inī ndá dē, de nī ncāhān dē: ¿Nā tēe cúu tēe yáhá, jā jondē tāchī níhin jíin mar jétáhví jā cáhān dē? ncachī ndá dē.



Chi Yāā Dios nī ncundáhví ndasí inī yā
nchivī ñayiví. De jā ñúcuán nī ntají yā
Sēhe yā nī nquiji, vísō mātúhún-ni yā
íyó, tácuā ndācá nchivī jā cándíja jì jā
scácu yā jì, mā tánū tāhvī jì chi sa
cutecū jì níí cání andiví.



40



60



ROMANOS 3:23

Chi ndihi ó nī nsāhá cuāchi, de jā ñúcuán nduú ní ncúu cuu ó nchivī ndāā nūū Yāā Dios.

ROMANOS 6:23

Chi yāhvi jā nīhīn nchivī sīquī cuāchi cúu jā tánū tāhvī ji.
Sochi tāhvī jā jéhe Yāā Dios cúu jā cutecū ō níí cání andiví, sīquī jā ní nduu inuú inī ō jíin Jētohō ō Cristo Jesús.

HEBREOS 9:27

De tá cúu nūū ní ncundaā jā cuū ndācá nchivī iin vuelta-ni,
de ñúcuán de sāhá ndāā Yāā Dios tiñu ji,



EFESIOS 2:8,9

Chi sīquī jā mānī ndasí yā jíin ndá nú cúu jā ní scácu yā ndóhó, chi nī ncandíja ndá nú jā sáhá yā jēhē nū. De nsūú sīquī jā ní nsáhá ndá máá nú cúu, chi tāhvī jā ní jēhe yā nūū nū cúu. Chi nduú nā tiñu váha ní nsáhá ó jā scácu yā yóhó, de jā ñúcuán ni iin ó mā cūú sáhá téyíí ó maá ó jā cuu scácu ó maá ó.

ROMANOS 10:9,10

Chi tú cāhān nū jā Jētohō nū cúu Jesús, de tú candíja nú jondē jíin inī jíin ánō nū jā ní natecū yā mähñú ndīyi nī nsáhá Yāā Dios, ñúcuán de scácu yā ndóhó. Chi jíin inī jíin ánō ō cándíja ó jā ní jīhī yā jēhē ō, de súcuán de sndáhvā Yāā Dios cuāchi ó. De jā cāhān ō jā Jētohō ō cúu Jesucristo, de súcuán de scácu yā yóhó.



SAN JUAN 3:16,17

Chi Yāā Dios nī ncundáhví ndasí inī yā nchivī ñayīví. De jā ñúcuán nī ntají yā Sēhe yā nī nquiji, vísō mátúhún-ni yā íyó, tácuā ndācá nchivī jā cándíja ji jā scácu yā ji, mā tánū tāhvī ji chi sa cutecū ji níí cání andiví. Chi nduú ní ntají Yāā Dios Sēhe yā inī ñayīví jā stánū tāhvī yā nchivī, chi sa jā scácu yā ji.

1 JUAN 5:11-13

De tūhun ndāā ñúcuán cúu jā ní nsāhá yā jā cutecū ō níí cání, de Sēhe yā ndíso tūhun cutecū ō. Nchivī jā íyó ji jíín Sēhe yā, ja nī nīhīn táhvī ji cutecū ji. Sochi nchivī jāá nduú íyó jíín Sēhe yā, mā níhīn táhvī ji cutecū ji. Tūhun yáhá téē nī cuēē nūū ndá ndóhó jā cándíja Sēhe Yāā Dios, tácuā cucáhnú inī nū jā ní nīhīn táhvī nū cutecū nū níí cání.



SAN MATEO 8-9; SAN MARCOS 1-2, 4;
SAN LUCAS 4, 8; SAN JUAN 2

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: E. Frischbutter, Sarah S.

Mixteco, Ocotepc NT (mie) © 1977,
Wycliffe Bible Translators, Inc. All rights reserved.

<https://live.bible.is/bible/MIETBL/MAT/1>

©2026 Bible for Children, Inc.

www.M1914.org

www.bibleforchildren.org

